

**共同經課-1 使徒行傳二章一節～二十一節**

1 五旬節 ê 期已經到，in lóng 聚集 tī 一所在。2 忽然 tùi 天有聲，親像大風 teh 吹，充滿 in 所坐 kui 間 ê 厝。3 就有 teh 分開 ê 舌，出現 hō in 看見，親像火 ê 舌，歇 tī tàk 人 ê 頂面。4 In lóng 受聖神充滿，chiah 開嘴講別樣 ê 腔口，是照聖神所賞賜 in 講 ê。5 Hit 時有虔誠 ê 猶太人，tùi 天下 tàk 國來 ê，toà tī 耶路撒冷。6 Chit-ê 聲一下起，眾人聚集紛紛亂亂，因為 tàk 人聽見 in 照伊家己 ê 土腔來講。7 就 lóng gông-ngiáh 奇怪，講，你看，chiah-ê teh 講 ê kiám 無一概是加利利人 mah？8 怎樣咱聽 in 講照咱 tàk 人所出世 ê 土腔 ah？9 咱 chiah-ê Phà<sup>n</sup>-th ê-a 人、Bí-thài 人、Í-lân 人，kap tiàm-tī Bí-só-pho-tāi-bí，猶太 kap Ka-phà<sup>n</sup>-to-ka，Pún-to kap 亞西亞，10 Hut-lū-ka kap Pông-hui-lī-a，埃及近 oá 古利奈 ê Lū-pí-a，chiah-ê 地方 ê 人，以及 tùi 羅馬來 ê 出外人，有 ê 是猶太人，有 ê 是入猶太教 ê 人，11 Kek-lí-tí 人、A-lat-pek 人，lóng 聽 in 用咱 ê 腔口來講上帝 ê 大事。12 就 lóng gông-ngiáh 躊躇，sa<sup>n</sup>-kap 講，這甚麼意思？13 亦有別人恥笑 in 講，in 是 lim 新酒 teh 醉。14 總是彼得 kap 十一個使徒 khiā-teh，大聲 kā in 講，猶太人，kap lóng 總 khiā 起 tī 耶路撒冷 ê 百姓 ah，lín tiòh 知 chit-ê，亦 tiòh 致意聽我 ê 話。15 Chiah-ê 人 m̄ 是酒醉，親像 lín 所 phah 算；因為 chit-tiáp tú-chiah 頂晡九點鐘：16 這就是託先知約珥所講 ê，講，17 上帝講，Tī 路尾 ê 時日，我 beh 用我 ê 神降落 tī 凡有肉體 ê；Lín ê 後生 lín ê cha-bó-kiá<sup>n</sup> beh 做先知講話，Lín ê 少年人 beh 看見異象，Lín ê 老人 beh 得 tiòh 眠夢；18 Tī hiah-ê 日我也 beh 用我 ê 神 降落 tī 我 ê 奴僕奴婢；in 亦 beh 做先知來講。19 頂面 tī 天裡我 beh 顯出奇事，下面 tī 地裡我 beh 顯出神蹟，就是血，kap 火，kap 煙霧；20 日 beh 變做暗，月 beh 變做血，Tī 主大 koh 榮顯 ê 日，bē 到 ê 事先；21 Koh 凡若求叫主 ê 名 ê，會得 tiòh 救。

**共同經課-2 詩篇一零四篇二十四節～三十四節、三十五節 b**

24 耶和華 ah，你所造 ê 怎樣 hiah choē！lóng 是你用智慧造成 ê；遍地滿滿你 ê 富有。25 Hia 有海，大 koh 闊，其中有算 boē 了 ê 動物，大細 ê 活物 lóng 有。26 Tī-hia 有船 teh 行；有你所創造 ê 大魚游來游去。27 Chiah-ê lóng teh thèng 候你，Thang 照時 hō in 食物。28 你 hō in，in 就拾起來；你 thī 開你 ê 手，in 得 tiòh 好物到飽。29 你掩你 ê 面，in 就掛慮；你將 in ê 氣收回，in 就死無，來歸 tī 土粉。30 你發出你 ê 神，in 就受創造；你 hō 地面換做新。31 願耶和華 ê 榮光永遠 tī-teh；願耶和華為 tiòh 伊所造 ê 來歡喜。32 伊看地，地就振動；伊摸山，山就出煙。33 我 beh 一世 n̄ 耶和華吟詩；我 iáu 活 ê 時 beh n̄ 我 ê 上帝唱歌 o-ló。34 願伊掠我 ê 靜靜想做合意；我 beh 因為耶和華歡喜。35 我 ê 心神 ah，tiòh o-ló 耶和華；Lín tiòh o-ló 耶和華。

**共同經課-3 羅馬書八章二十二節～二十七節**

22 因為咱知一切受造 ê 物到 chit 時 iáu teh sa<sup>n</sup>-kap 吐氣苦痛。23 M̄-nā án-ni，就咱本身得 tiòh 聖神頭水 ê 果子 ê，也心內家己吐氣，teh thèng 候設立做 kiá<sup>n</sup>，就是咱 ê 身軀 ê 贖回。24 因為咱得救是 tùi n̄ 望；但是已經看見 ê n̄ 望，m̄ 是 n̄ 望；因為所看見 ê，甚麼人 teh n̄ 望伊？25 獨獨咱若 n̄ 望 hit-ê 所無看見 ê，咱就吞忍 thèng 候。26 Koh 聖神也親像 án-ni 扶持咱 ê 軟 chiá<sup>n</sup>；因為咱 m̄ 知影 tiòh 怎樣祈禱照所應該 ê；獨獨聖神家己用 boē 講出 ê 吐氣替咱求。27 監察人 ê 心 ê 也知聖神 ê 意思，因為伊照上帝 ê 意思來替聖徒求。

**共同經課-4 約翰福音十五章二十六節～二十七節、十六章四節 b～十五節**

26 但是保惠師，就是真理 ê 神，tùi 父出 ê，我 tùi 父 beh 差伊就近 lín；伊若到，beh 為 tiòh 我做干證；lín 亦 beh 做干證，27 因為 lín tùi 起頭 kap 我 tī-teh。4 我 tùi 起頭無 kā lín 講 chiah-ê，是因為我 kap lín tī-teh。5 Ta<sup>n</sup> 我去歸 tī 差我 ê；lín 中間無人問我，講，你 beh tá-lòh 去？6 Kan-ta 為 tiòh 我有 kā lín 講 chiah-ê，lín 已經滿心憂悶 lah。7 但是我將實情 kā lín 講；我去，是做 lín ê 利益；我無去，保惠師無來就近 lín；若去，就 beh 差伊就近 lín。8 伊到，的確用罪，用義，用審判，來指正世間；9 用罪，因為 in m̄ 信靠我；10 用義，因為我歸 tī 父，lín 無 koh 看見我；11 用審判，因為 chit 世間 ê 人君已經受審判。12 我 iáu 有 choē-choē 項 beh kā lín 講，獨獨 lín 現今當 boē 起。13 到真理 ê 神來，伊 beh chhoā lín 入 tī 一切 ê 真理；因為伊 m̄ 是 beh 憑家己來講；是將伊所 beh 聽見 ê 來講；koh beh 用 teh-beh 來 ê 事報 lín。14 伊 beh 榮光我；因為伊 beh tùi 我所有 ê 領受；來報 lín。15 凡若父所有 ê lóng 是我 ê；所以我講，伊 beh tùi 我所有 ê 領受，來報 lín。